



## Rapport annual 2017

Preziadas commembras, preziai commembers

Cunquei che l'uniun ei stada igl onn vargau senza presidi, ei quella incumbensa vegnida exequida entras il vecepresident e la cassiera.

A caschun dalla radunonza dil 2017 ei vegniu elegiu ina cumissiun per organisar in viadi. Dalla cumissiun han fatg part: Jovita Vincenz, Gion Antoni Caminada e Ronnie Caminada. Els han fatg duas propostas; numnadamein a Spligia ed Andeer cun visitar la fortezia Grestawald. L'otra a Klotten cun visitar la piazza aviatica. Ils commembers han giu la caschun da sedecider per ina dallas variantas. Il resultat ei curdaus ulivamein cun 17 vuschs per Spligia e 17 per Klotten. La cumissiun ei lura sedicida per ir a Klotten. Fatg part dil viadi han la finala 32 personas.

A Klotten ha il pilot dalla Swiss, Jürg Girsberger, beneventau ed accumpignau nus duront il gi. Duront pliras uras havein nus astgau spassegiar cun dus guides tras la piazza aviatica e tedlar interessantas explicaziuns. Entgins han schizun astgau entrar el cockpit d'in aviun. Sin viadi a casa vein nus fatg pausa a Zezras per marendar e degustar vin grischun. Il president da Zezras e vischin da Vrin, Peter Lang, ha organisau l'occorrenza per nus. Il viadi ei staus emperneivels ed interessants ed ils participonts ein stai cuntents. In cordial engraziament allas personas ch'ei s'engaschadas per l'organisaziun.

L'entschatta digl onn ha igl usitau aperitiv da Daniev giu liug en casa da scola. Legreivlamein ei il Chor mischedau da Vrin/Surin sedeclaraus prompts da collaborar cun cant da cumpignia ensemen culs visitaders. Stai envidai ein ils commembers, la populaziun da Vrin e contuorn sco era ils hosps da vacanzas. Dau suatientscha agl invit han ca. 70 personas. Tier las personas ch'organiseschan igl apero setracta ei pli u meins mintg'onni dils medems. Cheu stuein nus far ponderaziuns tgei ch'ins savess far per optimar la situaziun.

L'uniun Cuminonza Vrin dumbrava il davos dil 2017 97 commembras e commembers. En cumparegliaziun cugl onn vargau ei quei ina persuna dameins. El decuors digl onn ha ei dau in mortori, 4 extradadas e 4 entradas novas.

El decuors digl onn havein nus giu 4 sesidas da suprastanza. L'emprema ha adina liug ensemen cun la cumissiun Fondo Greina per decider sur dallas damondas per contribuziuns. Silsunter essan nus sefatschentai cun encurir ina persuna per il presidi. Cunquei che Richard Caminada e Rina Caviezel ch'eran stai proponi dalla radunonza han declarau da buca vuler sorprendar l'incarica, essan nus i alla tscherca d'ina persuna adattada ed anflau quella cun Andrea Portmann. Ella ei gia s'engaschada per l'uniun el decuors dil davos miez onn e nus engraziein ad ella cordialmein persunter. Engraziar lessel era agl actuar per sia lavur supplementara da vicepresident sco era a Vus tuts che fageis part da noss'uniun e tgireis nossa cuminonza.

Vrin, ils 23 da fevrer 2018

La cassiera: Martina Caviezel